

INUIT ATAQATIGIIT

INATSISARTUNI



UPA16/71
23. maj 2016
Peter Olsen

Meeqqat peqqissumik imaqarluartumillu inerikkiartornissaannut, atualernissamut piareersimanissaannut nalinginnaasumillu perorsarsimassusaannut iluaqutaasussamik nunatsinni meeqqanut suli atualinngitsunut perorsaanikkut inerikkiartuutaasumik ilaqutariit meerartallit nuna tamakkerlugu atuinissamut piarerfissaqalernissaat qanoq qulakkeerneqarsinnaanersoq pillugu apeqquteqaat aallaavigalugu oqallisissiatut siunnersuut.

(Inatsisartunut ilaasortaq Hans Enoksen, Partii Naleraq)

Inatsisartunut ilaasortap Hans Enoksenip Partii Naleqqamiit apeqquteqaat aallaavigalugu oqallinnissamik siunnersuutaanut qulaani pineqartumut matumuuna Inuit Ataqatigiinniit imatut oqaaseqaateqassaavut.

Angajoqqaat meeqqerivimmiittuuteqartut qanoq akiliuteqartarnissaat pillugu oqartussaaffik kommuniniippoq; kommuunit nammineq aaliangertarpaat meeqqamut ataatsimut meeqqerivimmiittuutitaqarneq qanoq akeqassanersoq. Naatsumik oqaatigalugu meeqqeriveqarnermut tunngasut suulluunniit tamarmik kommunit oqartussaaffiisa ataaniipput.

Kommunit namminersortuunerat Inuit Ataqatigiinniit ataqqilluinnarparput, nalinginnaasumillu kommuunit namminersortuunerisa innarlerneqannginnissaat, qulaaniillu akuliuffigineqanngilluinnarnissaat Inuit Ataqatigiinniit pingaartitarilluinnarparput.

Taamaakkaluartoq meerartatta angajoqqaavisalu atugaannut tunngasunik oqallittoqaleraangat, Inuit Ataqatigiinniit oqalliseqataanissatsinnut tunuarsimaarneq ajorpugut. Apeqqutaatinnagu kia killullu tamanna oqartussaaffiginerana, akisussaaffigineranaaluunniit.

Taamaattumik Hans Enoksenip oqaluuserisassanngortitaanut tunuarsimaarnata soqutiginnilluarluta oqalliseqataassaavut.

Hans Enoksenip oqaluuserisassanngortitsinerminut tunngavilersuutigaa; angajoqqaat meerartallit, meerartamik meeqqerivimmiissinnaatitaanerannut periarfissaat nuna tamakkerlugu assigiinngippallaarnerujussuat, tamatumallu iliuuseqarfigineqartariaqarnera.

Kommunit akornanni akit tungaatigut assigiinngisitsinerujussuaq, tamatumalu kingunerisaanik pissakinnerusunut, angajoqqaanullu kisimiittunut artukkeerujussuarsimanerat akuersaarneqarsinnaanngitsoq aaqiivigineqartariaqalersorlu Hans Enoksen tunngavilersuutimi ilaatigut allappoq.

Ataatigut naqissuserlugu oqaatigeqqissavarput partii Inuit Ataqatigiit tassaammata pissakinneru-sunik sanngiinnerusortatsinnillu illersuisuusooq.

Taamaattumik Hans Enoksenip taamatut siunertaqarneranut anguniaqarneranullu isumaqataalluinnarpugut.

Angajoqqaat tamarmik kikkugalarunilluunniit assigiimmik meeqqerivimmiittuutitaqarnissaminnut periarfissaqartitaanissaat Inuit Ataqatigiinniit pingaartipparpugut. Apeqqutaassanngilaq kikkut akiligassaqaqarnersut akiligassaqaqannginnersulluunniit.

Meerartavut tassaammata pisuussutitta annerpaartaat pingaernerpaartaallu.
Annaanaveersaarlugit erligalugit paarilluartariarlugit, toqqissisimanartumillu atugassaqtillugit perorsagassavut.

Paarsilluernerpummi imminut akilerumaarpoq; inuiaqatigiit peqqissut, nuannaartut ingerlalluartullu taamaaliorutta pilersikkumaarpagut.

Atugarissaartut atugarissaanngitsullu akornanni assigiinngissuseq aatsaat taama annertutigilersimasoq Inuit Ataqtatigiinniit eqqumaffigilluinnakkatta ilagilluinnarpaat. Tamanna uggornarpoq ajuusaarnarporlu, taamaattoqarsinnaanngilaq akuersaarneqarsinnaanngilarlu

Taamaattumik pisuut piitsullu akornanni assigiinngissutsip annertusigaluttuinnartup unitsinneqarnissaa, nungusarneqarnissaalu pillugu suliniuteqarnissaq Inuit Ataqtatigiinniit pingaartilluinnakkatta ilagilluinnarpaat. Peqataaffigissavarput suleqataaffigissavarpullu.

Kisianni imaanngilaq meeqqeriviit akikilliinerinnaatigut, akeerutitsineriinnakkulluunniit naligiinnerulernissaq anguneqarsinnaasoq, naamik taamaattoqanngilaq. Naligiinnginnerujussuaq iliuseqarfigineqassappat, taava aatsaat tamanna pisinnaavoq inuiaqatigiit iluanni aqqissuuseqqinnerit annertuut pilersinneqarpata, soorlu; isumaginninnikkut aqqissuuseqqinnerit, boligsikringip tungaatigut aqqissuuseqqinnikkut, akileraartarnerup tungaatigut aqqissuuseqqinnikkut, siusinaartumik pisartagaqarnerup aammalu utoqqalinersiaqtarnerup tungaatigut aqqissuuseqqinnikkut, sanaartornerup iluani tapiissuteqartarnerup tungaatigut aqqissuuseqqinnikkut il.il.

Ila sorpassuit aqqissuuseqqinnerit eqqartorneqarsinnaagaluarput.

Aqqissuuseqqinnerit taava qanoq ittut eqqartorneqarsinnaappat?

Meeqqeriviit akeqassappat? Imaluunniit akeqassanngillat? Akeqassagunik qanoq akikitsigissappat?

Meeqqat Atuarfianni atuartuuteqartarneq akeqanngilaq. Sooq aamma taava meeqqerivimmiittuuteqartarneq akeqassava?

Apeqqutit taamaattut avitseqatigiissutigissallugit pissanganartuupput. Allammita qanoq isumaqarpat? Eqqartueqatigiinniarta, aqqissuuseqatigiinniarta, meeerartavut pillugit, meerartatta siunissaat pillugu, inuiaqatigiit pillugit, inuiaqatigiillu peqqissut siunissami pilersinneqarnissaat pillugu.

Taamatut oqaaseqarluta Hans Enoksenillu apeqquteqaat aallaavigalugu oqallisissiaanut qujalluta, inatsisartut ataatsimoortut oqaaseqaatissaatut siunnersuutaa taparserlugu oqallilluarnissassinik kissaappassi.

Qujanaq

Peter Olsen
Inuit Ataqtatigiit